



ル 5  
3079  
2





門 5  
號 3079  
卷 2

蜀中名勝記卷之四

成都府四

閩中曹學佺能始著

張詠創設記云按圖經秦惠王遣張儀陳軫伐蜀滅  
開明氏卜築蜀郡城方廣十里從周制也分築南北  
二少城以處商賈少城之跡今并湮沒隋文封子秀  
為蜀王因附張儀舊城增築南西二隅通廣十里今  
之官署即蜀王秀所築之城東北也方輿勝覽云隋  
蜀王秀取土築廣子城因為池有胡僧見之曰摩訶  
宮毗羅蓋梵語呼摩訶為大宮毗羅為龍謂此池廣



大有龍耳又云摩訶池一名汗池陳人蕭摩訶所開也蜀檣杙王建武成元年改摩訶池爲龍躍池王氏開國記云建將薨前兩月摩訶池有鷄鷓來集衍卽位仍改龍躍池爲宣華苑渭南集云摩訶池入王蜀宮中舊時泛舟入此池曲折十餘里至宋世蜀宮後門已爲平陸然猶呼爲水門也按今此池填爲蜀藩正殿西南尚有一曲水光漣漪隔岸林木翳翳遊者寄古思焉唐杜甫晚秋陪嚴鄭公摩訶池泛舟得溪字詩云湍駛風醒酒船迴霧起隄高城秋自落雜樹晚相迷坐觸鴛鴦起巢傾翡翠低莫教驚白鷺爲伴

宿青溪暢當偶宴摩訶池詩云珍木鬱清池風荷左右披淺鷗甯及醉慢舸不知移蔭簟林光冷照流簪影欹胡爲獨羈者雪涕向漣漪薛濤摩訶池懷蕭中丞詩昔以多能佐碧油今朝同泛舊仙舟淒涼逝水頽波遠惟有碑前咽不流高駢殘春遣興云畫舸輕橈柳色新摩訶池上醉青春不辭不爲青春醉只恐鶯花也怪人孟昶避暑摩訶池玉樓春詞冰肌玉骨清無汗水殿風來暗香滿簾開明月獨窺人欹枕釵橫雲鬢亂起來庭戶寂無聲時見疎星渡河漢屈指西風幾時來只恐流年暗中換宋祁過摩訶池詩十



頃隋家舊鑿池池平樹盡但迴隄清塵滿地君知否  
半是當年濁水泥又池邊不見帛闌船麥隴連雲樹  
繞天百歲興衰已如此爭教東海不爲田陸游摩訶  
池詩摩訶古池苑一過一銷魂春水生新漲煙蕪沒  
舊痕年光走車轂人事轉萍根猶有宮梁燕銜泥入  
水門 天寶逸事云明皇幸南京多以宮人自隨乃  
令成都畫手畫爲十眉以賜之一曰鴛鴦眉又名八  
字眉二曰小山眉又名遠山眉三曰五岳眉四曰三  
峯眉五曰垂珠眉六曰卻月眉七曰分稍眉八曰涵  
烟眉九曰拂雲眉又名橫烟眉十曰倒暈眉 李白

上皇西巡南京歌云胡塵輕拂建章臺聖主西巡蜀  
道來劔壁門高五千仞石爲樓閣九天開其二九天  
開出一成都萬戶千門入畫圖草樹雲山如錦繡秦  
川得及此間無其三德陽春樹似新豐行入新都若  
舊宮柳色未饒秦地綠花光不減上陽紅其四誰道  
君王行路難六龍西幸萬人歡地轉錦江成渭水天  
迴玉壘作長安其五萬國同風共一時錦江何謝曲  
江池石鏡更明天上月後宮親得照蛾眉其六濯錦  
清江萬里流雲帆龍舸下揚州北地雖誇上林苑南  
京還有散花樓其七錦水東流繞錦城星橋北挂象



天星四海此中朝聖主峩眉山上列仙庭其八秦開蜀道置金牛漢水元通星漢流天子一行遺聖跡錦城長作帝王州其九水綠天青不起塵風光和暖勝三秦萬國煙花隨玉輦西來添作錦江春其十劔閣重關蜀北門上皇歸馬若雲屯少帝長安開紫極雙懸日月照乾坤 古今集記云王建初克蜀造有紅樓綵繪華侈初潁川人華洪隨之入蜀賜姓王與諸子連名曰宗至是造紅樓建以爲應華洪之讖乃誅之王氏開國記云乾德四年秋紅樓肥遺見後蜀幸寅遜曰肥遺旱魃也張唐英引山經外傳肥遺有角

蛇角上有火見則大旱非魃鬼也按魃鬼目生頂上云 檇杙云王衍卽位之日卽治宣華苑乾德三年苑成延袤十里有重光太清延昌會真之殿清和迎仙之宮降眞蓬萊丹霞之亭土木之功窮極奢巧衍數於其中爲長夜之飲嬪御襍坐舄履交錯焉衍宴宣華苑宮詞云輝輝赫赫浮五雲宣華池上月華新月華如水浸宮殿有酒不醉眞癡人乃命宮人李玉簫歌之勸<sup>嘉</sup>宗壽酒也成都文類云李珣梓州人其妹爲蜀王衍昭儀有詞藻卽所稱李舜絃夫人是洪邁絕句載舜絃蜀宮應制詩濃樹禁花開後庭飲筵



中散酒微醒濛濛雨草瑤階濕鐘曉愁吟獨倚屏又  
釣魚不得詩云盡日池邊釣錦鱗菱荷香裏暗銷魂  
依稀縱有尋香餌知是金鈎不肯吞又隨駕游青城  
詩云因隨八駿上仙山頓隔埃塵物象間只恐西追  
王母宴卻憂難得到人間此與徐太后太妃同作者  
妃后作詳見詩話中絕句又載羣仙降蜀宮六首其  
一后土夫人云偶引羣仙到世間薰風殿裏醉華筵  
等閒貪賞不歸去愁殺韋郎一覺眠其二王母云滄  
海成塵幾萬秋碧桃花發長春愁不來便是數千載  
周穆漢皇何處遊其三麻姑云世間何事不潛然得

失人情命不延適向蔡京廳上飲回頭已是一千年  
其四上元夫人云思量往事一愁容阿母曾邀到漢  
宮城闕不存人不見茂林荒草恨無窮其五弄玉云  
彩鳳飛來到禁闈便隨王母駐瑤池如今記得秦樓  
上偷見蕭郎惱妾時其六太真云春夢悠揚生下界  
一堪成笑一堪悲馬嵬不是無情地自遇蓬萊睡覺  
時蓋亦附會杜光庭王氏男女仙傳而然矣 蜀檮  
杌初王宮殿皆題匠人孟得姓名及知祥入蜀居  
之人以爲先兆云長興五年正月白龜遊宣華苑苑  
卽王氏所建孟氏呼爲仙花苑蓋音之訛或指仙人



所進旌節花而名也明年七夕知祥宴丹霞樓觀宮人乞巧因寢疾而終孟昶廣政三年上元觀燈于露臺舞娼李艷娘有姿容召入宮賜其家錢十萬六年春昶大選良家子以備後宮限年十五以上二十以下於是後宮有昭儀昭容昭華保芳保香保衣安宸安蹕安情修容修媛修娟十四號秩比公卿大夫士焉花藥夫人者本青城費氏女以才色嬖于後宮吳曾漫錄以爲徐匡璋所納女拜貴妃別號花藥夫人以其色似花藥翹輕也又陞號慧妃喻其性也夫人嘗效王建作宮詞百首其一云五雲樓閣鳳城閒花

木長新日月閒三十六宮連內苑太平天子住崑山其二會真廣殿約宮牆樓閣相扶倚太陽淨瑩玉階橫水岸御爐香氣撲龍牀其三龍池九曲遠相通楊柳牽絲兩岸風長似江南好風景畫船來往碧波中其四東內斜將紫氣通龍池鳳苑夾池中曉鐘聲斷嚴粧罷院院紗窗海日紅其五殿庭新立號重光島嶼亭臺盡改張但是一人行從處黃金閣子鎖牙牀其六安排諸院接行廊水檻周迴十里強青錦地衣紅線毯盡鋪蘭麝鬱金香其七夾城門與內門通朝罷巡遊到苑中每日日高祇候處滿隄紅艷立春風



其八厨船進食簇時新侍坐無非列近臣日午殿頭  
宣索鱠隔花催喚打魚人其九立春日進內園花紅  
菜輕輕漱淺霞跪到玉堦猶帶露一時分賜與宮娃  
其十三面宮城盡夾墻苑中池水自茫茫直從獅子  
門前入旋見亭台繞岸傍其十一離宮別院達宮城  
金板輕敲合鳳笙夜夜月明花樹底傍池長有按歌  
聲其十二御製新翻曲子成六宮纔唱未知名盡將  
鸞篋來抄譜先按君王玉笛聲其十三旋移紅樹廡  
青苔宣使龍池更鑿開展得碧波寬似海水心樓殿  
勝蓬萊其十四修儀承寵住龍池掃地焚香日午時

等候大家來院裏看教鸚鵡念新詩其十五六宮官  
職總新除宮女安排入畫圖二十四司分六局御前  
相見錯相呼其十六才人出入每參隨筆研相從遶  
曲池能向綵箋書大字忽防禦御製寫新詩其十七春  
風一面曉粧成偷折花枝傍水行卻被內監遙覩見  
故將紅豆打黃鶯其十八小毬場近曲城頭宣喚勳  
臣試打毬先向畫廊排玉幄管絃聲動立浮油其十  
九梨園弟子簇池頭小樂携來候宴遊試炙銀笙先  
按拍海棠花下合梁州其二十殿前排宴賞花開宮  
女侵晨探幾回斜望苑門遙舉袖傳聲先喚近臣來



其二十一供奉頭籌不敢爭上前專喚近臣名內人  
酌酒纔宣賜馬上齊呼萬歲聲其二十二殿前宮女  
總纖腰初學乘騎怯又嬌上得馬來纔似走幾回拋  
鞚抱鞍鞦其二十三自教宮娥學打毬玉鞍初跨柳  
腰柔上朔知是官家認遍遍長贏第一籌其二十四  
翔鸞閣外夕陽天樹影花光遠接連望見內家來往  
處水門斜過罨樓船其二十五內人逐隊採蓮時驚  
起鳧鷖兩岸飛蘭棹把來齊拍水並船相鬪濕羅衣  
其二十六新秋女伴各相逢罨畫船飛別浦中旋折  
荷花伴歌舞夕陽斜照滿衣紅其二十七少年相逐

採蓮回羅帽羅衣巧製裁每到岸頭長拍水競提纖  
手出船來其二十八早春楊柳引長條倚岸綠隄一  
面高稱與畫船牽錦纜暖風搓出綠絲條其二十九  
婕妤生長帝王家常近龍顏逐翠華楊柳岸長春日  
暮傍池行困倚桃花其三十月頭支給買花錢滿殿  
宮人近數千遇着唱名多不語含羞急過御床前其  
三十一太虛高閣凌波殿背倚宮牆面枕池諸院各  
分娘子位羊車到處不教知其三十二寒食清明小  
殿傍綵樓雙夾鬪雞場內人對御分明看先賭紅羅  
十擔床其三十三水車踏水上宮城寢殿簷頭滴滴



鳴助得聖人高枕興夜深長作遠灘聲其三十四平  
頭船子小龍床多少神仙立御旁旋刺篙竿令過岸  
滿池春水蘸紅粧其三十五苑東天子愛巡遊柳岸  
花堤枕碧流新教內人工射鴨長將弓箭遶池頭其  
三十六羅衫玉帶最風流斜插銀篋慢裏頭間向殿  
前騎御馬掉頭橫過小紅樓其三十七沉香亭子傍  
池斜夏日巡遊歇翠華簾畔越盆盛淨水內人手裏  
割銀瓜其三十八薄羅衫子透肌膚夏日初長板閣  
虛獨自憑欄無一事水風涼處讀文書其三十九金  
畫香臺出露盤黃龍雕刻遶朱欄焚修每遇三元日

天子親簪白玉冠其四十六宮一例羅冠子親樣交  
鐫白玉花欲試淡妝兼道服面前宣與唾孟家其四  
十一三月櫻桃乍熟時內人相引看紅梳回頭索取  
黃金彈遶樹藏身打雀兒其四十二小小宮娥到內  
園未梳雲鬢臉如蓮自從配與夫人後不使尋花亂  
入船其四十三錦城上起凝煙閣擁殿遮樓一向高  
認得聖人遙望見碧闌干映赭黃袍其四十四大臣  
承寵賜新莊梔子園東柳岸傍每日聖恩親幸到板  
橋頭是讀書堂其四十五舞頭皆着畫羅衣唱得新  
翻御製詞每日內庭聞教隊樂聲飛出躍龍池其四



十六春早尋花入內園競傳宣旨欲黃昏明朝隨駕  
遊蠶市暗使輶車就苑門其四十七半夜船遊載內  
家水門紅蠟一行斜聖人正在宮中飲宣使池頭旋  
折花其四十八春日龍池小宴開岸邊亭子號流杯  
沉檀刻作神仙女對捧金樽水上來其四十九慢梳  
鬢髻著輕紅春早爭求芍藥叢近日承恩移住處夾  
城裏面占新宮其五十別色官司御輦家黃衫束帶  
臉如花深宮內苑參承慣常從金輿到日斜其五十  
一日高房裏學圍碁等候官家未出時爲賭金錢爭  
路數專憂女伴恠來遲其五十二樗蒲冷淡學投壺

箭倚腰身約畫圖盡對君王稱妙手一人來謝一人  
輸其五十三慢揜羅袖指纖纖學釣池魚傍水簾忍  
冷不禁還自去釣竿長被別人拈其五十四宣徽院  
約池南畔粉壁紅窗畫不成總是一人行幸處徹長  
聞奏管絃聲其五十五丹霞亭浸池心冷曲沼門含  
水腳清傍岸鴛鴦皆有對時時出向淺沙行其五十  
六楊柳陰中引御溝碧梧桐樹擁朱樓金陵城共膝  
王閣畫向丹青也合羞其五十七晚來隨駕上城遊  
行到東西百尺樓回望苑中花柳色綠陰紅艷滿池  
頭其五十八牡丹移向苑中栽盡是藩方進入來未



到末春綠地暖數般顏色一時開其五十九明朝臘日官家出隨駕先須點內人回鶻衣裝回鶻馬就中偏稱小腰身其六十盤鳳鞍韉闊色裝黃金腰跨紫游韁自從揀得真龍種別置東頭小馬坊其六十一翠輦每隨城畔出內人相次簇池隈嫩荷花裏搖船去一陣香風送水來其六十二高燒紅蠟點銀燈秋晚花池景色澂今夜聖人新殿宿後宮相近覓祇承其六十三苑中排比宴秋宵絃管掙攢各自調日晚閣門傳聖旨明朝盡放紫宸朝其六十四夜深飲散月初斜無限宮嬪插亂花近侍婕妤先過水遙聞隔

岸喚船家其六十五宮娥小小艷紅粧唱得歌聲遶畫梁緣是太妃新進入坐前頒賜綠羅箱其六十六池心小樣釣魚船入翫徧宜向晚天掛得綵帆教便放急風吹過水門邊其六十七傍池居住有漁家收網搖船到淺沙預進活魚供日料滿筐跳躍白銀花其六十八秋晚紅粧傍水行競將衣袖撲蜻蜓回頭瞥見宮中喚幾度藏身入畫屏其六十九御溝春水碧於天宮女尋花入內園汗濕紅粧行漸困岸頭相喚洗花鈿其七十昭儀侍宴足精神玉燭抽看記飲巡倚賴識書爲錄事燈前時復錯瞞人其七十一後



宮阿監裏羅巾出入經過苑圍頻承奉聖顏憂誤失  
就中常怕內夫人其七十二管絃聲急滿龍池宮女  
藏鈎夜宴時好是聖人親捉得便將濃墨掃雙眉其  
七十三密室紅泥地火爐內人冬日晚相呼今宵駕  
幸池頭宿排比椒房得暖無其七十四三清臺近苑  
墻東樓檻層層映水紅盡日綺羅人度曲管絃聲在  
半天中其七十五高亭百尺立春風引得君王到此  
中床上翠屏開六扇折枝花綻牡丹紅其七十六內  
人承寵賜新房紅紙泥窗遶畫廊種得海榴才結子  
乞求自進與君王其七十七翡翠簾前日影斜御溝

春水浸成霞侍臣向晚隨天步共看池頭滿樹花其  
七十八金碧闌干倚岸邊卷簾初聽一聲蟬殿頭日  
午搖紈扇宮女爭來玉座前其七十九嫩荷香撲鈎  
魚亭水面文魚作隊行宮女競來池畔立倚簾呼喚  
勿高聲其八十新翻酒令著詞章侍宴初聞意卻忙  
宣使近臣傳賜本總教諸院遍抄將其八十一畫船  
花舫總新粧進入池心近島傍松柏鏤窗楠木板暖  
風吹過四圍香其八十二西毬場裏打毬回御宴先  
從苑內開宣索教坊諸伎樂傍池催喚入船來其八  
十三年初十五最風流新賜雲鬟使上頭按罷霓裳



歸院裏畫樓雲閣總重修其八十四春來睡起曉粧  
成隨侍君王逐處行畫得自家梳洗樣相憑女伴把  
來呈其八十五寢殿門前曉色開紅梔藥樹間花栽  
君王未起珠簾卷宮女更番上直來其八十六海棠  
花發盛春天遊賞無時列御筵遶岸結成紅錦帳暖  
枝低拂畫樓船其八十七日晚宮人外按回自牽驄  
馬出城隈御前接得高义手射得山雞喜進來其八  
十八朱雀門高苑外開毬場空濶淨塵埃預排白兔  
兼蒼狗等候君王按鵲來其八十九會真觀裏玉清  
壇新點宮人作女冠每度駕來羞不出羽衣初著怕

人看其九十老大初教作道人鹿皮冠子淡黃裙後  
宮歌舞全拋擲每日焚香事老君其九十一法雲寺  
裏中元節又是官家降誕辰滿殿香花爭供養內園  
先占得鋪陳其九十二酒庫新修近水傍潑醅初熟  
五雲漿殿前供御頻宣索進入花間一陣香其九十  
三白藤籠插白銀花閣子門前寢殿斜近被宮中知  
了事每來隨駕使煎茶其九十四金章紫綬選高班  
每每東頭近聖顏材藝足當恩寵別只堪供奉一場  
間其九十五安排竹柵與笆籬養得新生鶉鴿兒宣  
受內家教餵飼花毛間著總皆知其九十六內人深



夜學迷藏遍遶花叢水岸傍乘興忽來山洞裏大家  
尋覓一時忙其九十七小院珠簾著地垂院中排比  
不能知羨他鸚鵡能言語窗裏偷教鸚鵡兒其九十  
八島樹高低約浪痕苑中斜日已黃昏樹頭木刻雙  
飛鶴颺起晴空映水門其九十九小雨霏微潤綠苔  
後闌紅杏傍池開一枝插向金餅裏捧進君王玉殿  
來其一百錦鱗躍水出浮萍苻草牽風翠帶橫恰似  
金梭攬碧沼好題幽恨寫閨情又劉希夷蜀城懷古  
云蜀土饒水竹吳天積風霜窮覽通表裏氣色何蒼  
蒼舊國有年代青樓思豔粧古人有歲月白骨宜邱

荒寂歷彈琴地幽泛讀書堂立龜埋卜室采鳳滅詞  
場陣圖一一在栢樹雙雙行鬼神清漢廟烏雀參秦  
倉歎世已多感懷心益自傷賴蒙靈邱境時當明月  
光宋祁覽蜀宮故城有作云國破江山老人亡岸谷  
摧鴛飛今日瓦鹿聚向時臺故苑猶霏雪荒池但劫  
灰積遺糊處壤闢記數殘枚恨月窺林下悲風覓隴  
來依城狐獨速失厦燕徘徊廢社纔存樹陰垣自上  
苔有情惟杜宇長爲故王哀 唐盧求成都記序略  
云蜀郡太守自秦惠王滅蜀始而李冰文翁其最著  
者益州刺史自漢武帝開疆始而王遵王襄其最著



者始時實一官也而興廢異焉劉先主於益州置牧  
蜀郡置守而官始分矣晉太康以刺史治太城郡守  
治少城而地亦分矣改益州爲劍南節度使自唐天  
后始改蜀郡爲成都尹自明皇西巡始其後州郡亦  
得相兼焉宋知成都府事者往往以密直使相稱簡  
貴尊重淳化初雖降爲州而體自若乃中興小厯所  
載則以蜀有都轉運使遂罷制置之設而張燾且得  
以成都行四川民事矣其公署邸閣留題碑記間者  
班班可考焉 轉運署舊有燕思堂堂上爽西樓趙  
清獻再入蜀所建文同與可記之於前李石知幾記

之於後 轉運司園亦稱西園園中有西樓有錦  
亭一名翠錦亭章粲詩序云轉運西園是僞蜀權臣  
故宅爽塏清曠隨處足樂於是作爲十詠羣公咸和  
之備錄以志其盛云爾西園詩云古木鬱參天蒼苔  
下封路幽花無時歇醜石終朝踞水竹散清潤煙雲  
變晨暮何必憶山林直有山林趣玉溪堂詩云堂因  
水得名方沼當其後漪瀾蕩棖桷窗口挹花柳蟲魚  
不避人鷗鷺若相友午枕夏簟涼此樂亦奚有雪峯  
樓詩云層構壓池塘不僭亦不偏影浮江水靜寒逗  
雪山色撫檻接修竹連簷引蒼栢注目望長安無那



濃雲隔海棠軒詩云珍葩寄幽島正對孤山植優游  
自俯仰紅綠若組織春酣晴日曛坐久濃香逼池面  
淨可鑒朝霞罩澄碧月臺詩云蜀地饒夜雨輕陰多  
蔽天見月月無幾築臺待嬋娟高凝桂影近俯視雲  
屋連顧盼已塵外欲挹瑤宮仙翠錦亭詩云榭楠百  
尺餘排列拱簷際畏日自成陰隆冬甯減翠虛曠得  
寂理懶癖資濃睡誰知官府中獲此冲寞味潺玉亭  
詩云傍砌醜小渠迴環是流水石蜃吐珠涎清響醒  
人耳風微竹影碎月皎波光起颯爽無塵囂靜適心  
所喜茅菴詩云竹間構圓菴所向自瀟灑珍禽弄巧

舌宛是居山野默坐見真心萬緣盡虛假勿陋尋尺  
地茲焉息意馬水閣詩云架木浮水中略徇通孤島  
扶疏花影斜鱗刺跳魚小風月所得多經營信云巧  
隱几寂無人朱欄萃幽鳥小亭詩云花邊二小亭雙  
跨清渠上規模雖甚隘幽僻良可賞幸依嘉木陰未  
羨大廈廣不足延賞朋携筇常獨往吳師孟和云十  
紀權臣第修城外臺宅喬木不知秋名花數逾百遠  
如山林幽近與塵埃隔惠政裕一方民猶以爲窄又  
華構枕方塘使臺寂佳致二色真楠材輪奐極精緻  
花木四面圍如立復如侍一道仰澄清此是澄清地



又西北有高樓梁棟雲常起簷牙挂連蜷欄影搖清  
泚爽氣雪山來一瞬極千里但欲摠遠懷無憂可銷  
弭又花激對高軒如用丹青影錦水一匳紅玉臺千  
面笑松篁兩翠幄常護東西照子細看韶妍方知化  
工妙又雅意待蟾光煩襟期爽快無雲點太清遠覽  
周色界天宇淨琉璃露下真沉瀟勤渠諗後人宜葺  
不宜壞又東閣治臺政西堂備燕飲介於二堂間華  
構饒花品紅紫鎮長春四時如活錦公暇一繩床上  
有通中枕又至人泉石心俚耳便絲竹醜渠逗清冷  
朝夕淙寒玉試聽自然聲不減雲璈曲卻返倒聞機

五音常自足又結茅爲圓屋環堵不開牖齊居如雁  
堂廣長纔六肘深藏子猷竹不植陶潛柳勿起滅定  
心宴坐空諸有又形制似方橋島岸相連屬春和逗  
涼颼晝影浮淨綠佳人羅韞輕花時相步續澄瀾忽  
生暈下有雙鳧浴又尺水走庭除花木皆周匝雙亭  
正相值僅能容一榻公餘時獨來隱几聊噓哈典謁  
或通名東榮有賓閣許將和云高牙負北郭芳園路  
西轉鳥鳴戀故木蘭茁歸新畹坐延花景深行倚筇  
杖穩翳然想林木會心不在遠又朱堂俯玉谿玉谿  
清且幽從公蹇息偃撫景空夷猶浮雲冠員島白日



回方流砥此有光碧何必崑崙洲又重樓起城陰乘  
高望西極列峯橫青天飛雪千里積疑是空素山冬  
夏海中白莫恠頻東向上有思歸客又海棠冠蜀花  
此軒花尤冠紅雲簇蘂細綠水照葉嫩倚粧宮粉聚  
疊綺霞光散雨淚點春風應懷上林怨又蜀地山四  
維益州平如掌累臺鬱臨風坐看月宵上稍出叢木  
未始發眾籟爽茲焉躡遊目一攬天地廣又闌干竇  
溜長窳窳空埃靜修林密葱翠盡得錦城錦雲舒青  
青色風散搔搔影未爲夜行人共此晝遊永又引泉  
注清渠潺潺漱寒玉側出閬風遲驟驚江雨速飛瀨

乍揚曰樛木細涵綠晝夜流不止肯效楚人哭又茨  
茹以爲菴環堵蕭然虛內樂苟自足容膝亦有餘旁  
依修竹密上翳青松疎勿言此中陋中有君子居又  
飛閣出方池修曲見空莽偏臨花塢近平覺春波長  
反景澄餘暉夕陰帶浮爽從容觀魚樂不減遊濠上  
又翩然溝上亭左右相映帶修栴列翠幄長松偃高  
蓋地褊景逾寬處約志彌泰誰知坐嘯間心遊萬物  
外豐稷和云仙化二十四境遠難遍探錦城使君園  
雅與雲洞參回光試一覽紫翠絕西南池映金波淨  
花沾玉露甘又一水從何來應是崑山頂醜成綠玉



池虛堂逼清影公退冷然賞了非心外境魚泳陽光  
動鳥啼春晝永又雪峯在何許樓倚青霄端每來注  
心目不覺生羽翰終藉好風力雲散銀闕攢隻履西  
歸客應笑空倚欄又文錦初動機晨霞欲敷照香傳  
雪樓濃影落玉溪倒子美不能賦春工一何妙惟有  
賞心人相逢祇微笑又石印魚在屏犀透星入角迺  
知明月光日用人不覺陟此百尺臺餘念坐消剝洞  
曉弦望機仙丹茲可學又簷外列修木凜凜正人氣  
有德必有文爛兮五色備豈同天韶花弄春張繡被  
須信輪囷材堪爲萬乘器又養源在西山如玉抱精

白引之落錦渠歷耳不可擇風雨雜鳴球珠璣瀉雲  
液恰似偃谿聲醒悟迷途客又覆以潔白茅環以琅  
玕竹天籟傍鼓笙月沼對鋪玉借問清坐翁此外更  
何欲笑指博山鑪香飛栢子綠又長虹臥松江一葦  
航大河豈如此安穩無復畏風波幽香萃花島魚藻  
旨且多徙倚小欄曲月色透薜蘿又東西對孤鶩杖  
屨可休歇容光日月來矧此明四徹鱗木張幄翠蜃  
樓飛玉潔往往得意時宛在廣寒闕楊怡和云池臺  
密相望曾是故侯宅賞心知幾人喬木已百尺低花  
拂烏帽古蘚駁蒼石欲問昔豪華秋風掃無迹又虛



堂已深窈那復要營室使君寂無事閉閣臥終日臨  
池狎清泚養竹聽蕭瑟不爲省春耕輶車肯輕出又  
脩脩樓下竹灑灑竹間水樓高雖不見清響長在耳  
晨光露星崦積玉照窗紙崑閩亦何人當從跨金鯉  
又花如窈窕人宛在水中沚當軒有餘好終日玩芳  
蘼池清藻壓枝波動魚爭藻錦帳想含春歸心浩然  
起又嘉木密交陰月夕苦蒼翳高臺出林杪遠目望  
天際不厭清露寒祇恐輕雲蔽可但少陵翁能思斫  
仙桂又峩峩碧油幢轟轟羽葆蓋燕居不廢巖環竦  
布亭外濃陰生晝寒微吹發天籟憑几對凝香衣冠

嗒如蛻又使君漱流心官府未始忘亭下玉溪水撲  
碎白玉瑤清耳不待洗高懷自滄浪安得援瑤琴寫  
此聲琅琅又緝茅如蝸廬容膝纔一丈規圓無四隅  
空廓含萬象繩牀每宴坐不與物俯仰惟許歲寒君  
虛心環几杖又小閣平池陰危橋屬花嶼杖屨樂幽  
間龜魚蔭深阻刻柱記新漲弄水滌煩暑物我久相  
忘珍禽近人語又方亭惟四柱對峙花竹間下有雪  
嶺水淙流日潺潺宛如雙綵舸纜向春波灣欲起江  
湖心而奈風濤艱杜敏求和云潭潭刺史府宛在城  
市中誰知園亭勝似與山林同幽鳥語晴晝好花嬌



春風物情如有待賦詠屬詩翁又堂前對花柳堂後  
甌沼沚賸有堂中人虛心湛如水煩暑當風窗中宵  
隱月几作詩紀勝槩詩與水清泚又西山最高峯積  
雪連四季登樓試寓目八國有故地烽埃雖久息武  
經思預備文饒昔籌邊公意今無媿又東風開百花  
獨有海棠勝猩血染珠璣點綴枝頭賸日暖錦段新  
兩餘燕脂凝何時東閣梅方能動詩興又月從海上  
來皎皎入我牖何如登高臺對月把尊酒問月月無  
言浩歌詩千首幾人知此樂此樂公所有又材大難  
爲用嘗誇古栢篇亭前老榭楠黛色亦參天夏暑借

清陰秋籟得自然有如愛庭楸朝暮東西偏又林亭  
幽且深砌下玉谿水琮琤環佩聲曉夕清心耳使君  
性所樂愛玩不少已方持利物心默坐窮至理又深  
深竹林下圓安最幽僻高懷本恬曠野趣助間適眾  
人奔名徒浮世榮物役豈知菴中樂道勝心自逸又  
方池導流水橫閣上尋文晨曦夜月光罩影相滉漾  
游魚時出沒飛鷗亦上下終朝倚欄干不見有風浪  
又二亭雖云小好在泉石間白石自齒齒清泉亦潺  
潺公府無留事暫來寄餘閒筇杖烏角巾一日幾往  
還 宋李良臣東園記云益州路兵馬鈴轄种侯治



其後圃爲池亭臺榭植佳華莖美木館宇星陳欄檻  
翼翼舊有池焉泉竇堙塞涸爲枯泥偶新泉破地而  
出從而導之則故泉繼發潯沸衍溢種公築堂其北  
命之曰雙泉挾以二軒一曰錦屏以海棠名一曰武  
陵以桃溪名梁池而南爲亭曰寒香以梅名後爲茅  
亭曰幽芳以蘭蕙名池東爲大亭曰三雨以桃杏梨  
名池南兩亭東西對峙曰綠淨曰連碧雙亭之北有  
老栢數十株巨幹屹立爲亭其中曰翠陰復樓其東  
曰朝爽西因垣而山曰五峯下曰五峯洞前爲山館  
水繞環之宛如山間文同丹淵集云成都鈴轄東園

有梅樹樹下有素芳亭慶曆中四方館使太原王公  
府尹程公賦詩刻石存焉後二十年太原之子道恭  
及趙闕道又飲於亭上賞梅賦詩俾與可序之詩詳  
見方物記中 張詠朔設記曰王建孟知祥迭稱僞  
號乾德初王師弔伐申命參知政事呂餘慶知軍府  
事取僞冊勳府爲治所淳化甲午降府爲州至道丁  
酉歲詠始議改作東因孟氏文明廳爲設廳廊有兩  
樓中門立戟因王氏西樓爲後樓樓前有堂堂有掖  
室室前迴廊南爲暖廳廳屏有黃筓畫雙鶴花竹怪  
石在焉名曰雙鶴廳次南爲涼廳廳壁有黃氏畫湖



灘山水雙鷺在焉名曰畫廳涼暖二廳便寒暑也涼廳西有都廳廳在使院六十間之中所以便議公也院北有節堂堂北有正堂與後樓前爲次西位也節堂西通兵甲庫所以示積藏也涼都二廳南列四署同寮以居前門通衢後門通廳所以便行事也公庫直室客位食廳之列馬廐酒庫園菓蔬菘之次四面稱宜無不周盡疏篁奇樹香草名花所在有之不可殫記東挾戍兵一營南有軍資大庫改朝西門爲衙西門去三門爲一門凡得僭偽之迹屋大小七百四十間二營不在數 張俞府衙新書堂詩引云號略

楊保臣由將作屬官隨侍於益府新闢書堂延儒者講文藝俞作新書堂詩以贈之云志士營道日築室養賢名鋤荒出幽邃掃室迴虛明山嶽凌墻壁谿塘瀉窗楹蘭蕙露景晚松桂秋風生琴瑟閒古奏樽疊湛寒清默意馳萬象遊心覽八絃羣經互粲粲百氏紛營營禮樂立制作文章懸準程唐虞化已遠周禮道尙行師友得正士講論無俗聲邪侈不可入紛華固難傾修辭力士巧厲學逾農耕天爵旣自後人文取其榮元侯方作鎮列士爭獻成學校溢都市謳吟洽黎氓甯同稷下議飽食談縱橫 銅壺閣亦稱郡



樓垂崖張公鎮蜀時通夕宴坐郡樓上鼓番漏水厯厯分明一刻差誤必詰之守籤者服爲神明公謂鼓角爲中軍號令不可不謹爾京鐘帥成都首訪茲閣屹然自若銅壺漸失實矣因詢其漏法則寅申巳亥陟降其水者凡四旣無所依據且其箭以七日半爲等日升一刻必驟進之前卻頻數不無差忒知成都縣事臨邛宋朝英於是始更其法測午中之晷爲升箭之初畢百刻而後易仍以厯象考七十二候初未昏明晝夜長短之數日異旬殊差布於箭乃爲亭其下圖刻漏製鏡諸石且名以惜陰建安吳棫記云府門

稍東垂五十步慶厯四年知府事蔣公堂作漏閣以直午門以八分大字題額曰銅壺巋然南向一府之冠也崇甯初閣灾政和元年棫承乏尹事始至府視閣故處累土如臺然問吏吏曰前尹蔣卽臺爲門治材畧具朝廷亦嘗賜度牒售錢六百萬有奇尹去弗克成問錢與材今安在曰材爲他所繕修輟用之錢則帑官專輒兌費矣棫曰午門旣臺門也茲唯閣之宜奚臺之有卽日便撤累土圖閣如慶厯時通閣上下一十有四間其高一丈六尺有五寸廣十丈深五丈有六尺審曲面勢丹堊是飾瓴覆甍甃厥有夔度



中設關鍵闔闔惟謹閣成初置天聖中燕梓州肅所  
制蓮花漏於其下閣穴漏毀閱十載更六尹於茲而  
閣成漏悉如燕製匱一壺一泉一箭四十有八銅烏  
逼水而下金蓮浮箭而上氣二十四候七十二百刻  
十二辰率是箭而定云 歲華紀麗天禧初趙楨爲  
守三月三日開西樓亭榭俾士庶遊觀自是每歲寒  
食闢園張樂酒爐花市茶房食肆過於蠶市士女縱  
觀宋田况寒食開西園詩云春風寒食節夜雨晝晴  
天日氣薰花色韶光徧錦川臨流飛鑿落倚榭立鞦  
韆檻外游人滿林間飲帳鮮眾音方雜逕餘景更留

連座客無辭醉芳菲又一年宋祁翠錦亭晚矚詩云  
長夏宜高明緩帶散煩窘憑軒一超然目與天俱盡  
山從雲端現日就林外隱風來草木披煙生井闔近  
自公况多暇冲臆無留蘊卽此可宴居何須事遊軫  
西樓詩云炎氛隨日入岑寂坐遙帷倦鶯昏投浦驚  
蟬夜去枝桂華兼月破槎影帶星移珍重窻風好羲  
人卽此時吳中復西園十詠詩序云成都西園樓榭  
亭池菴洞最勝者凡十所又於其間勝絕者西樓賞  
皓月眺岷山翠巖亭臨清池濯錦水志殊土之產有方  
物快蔭樾之風有竹洞雜花異卉四時遞開翠幹茂



林蔽映軒戶足以會賓僚恣燕息因題十詠以見登覽之盛也西樓詩云信美他鄉地登臨有故樓清風破大暑明月轉高秋朝暮岷山秀東西錦水流賓朋逢好景把酒爲遲留眾熙亭詩云亭枕方塘上軒開四照新花涵清露曉風卷綠波春日暖眠汀鷺荷翻躍錦鱗熙熙遊宴地行樂慰西人竹洞詩云陰森過百步屈曲鎖莓苔翠色寒無改清風時自來葉籠蒼玉幹路入碧雲堆吏散無公事支筇到幾回方物亭詩云草木蟲魚部披尋自古無飛沉天產異生植土風殊物色隨心匠形容記績圖虛亭玩真意浩思滿

江湖翠栢亭詩云眾木墜黃葉皴皮抱翠枝自然根性在不爲雪霜移靈潤承多露清陰貫四時婆娑歲寒意每到坐遲遲圓通菴詩云對此圓通境陶然勝靜齋觀空無物我扣寂外形骸燕坐埋遺照虛名莫疚懷人間憂樂地所喪甚山崖琴壇詩云瀟灑琴壇上賢侯養道情無今亦無古求意不求聲林邃風初靜雲收月乍明拂絃成一弄塵思浩然清流杯亭詩云結客乘公暇流觴逐浩歌亂峯晴倒影曲水宛迴波小海逢元已蘭亭記永和西州行樂事應比晉賢多喬栢亭詩云木占西園勝亭延上客過色無花卉



妬堅爲雪霜多幹有千年秀根含一氣和明堂求厚棟可得老巖阿錦亭詩云簾幕臨彫檻窗疎照爛霞園林初過雨風日猛催花香入遊人袖紅堆刺史家四時俱好景終不似春華 唐書李德裕建籌邊樓于成都府治之西四壁圖蠻夷險要日與習邊事者籌畫其上女校書薛濤上籌邊樓詩云平臨雲鳥入窗秋壯壓西川四十州諸將莫貪羌族馬最高層處見邊頭宋陸游曰籌邊樓故基莫攷淳熙三年制置使知府范公成大重建卜地在子城西南隅樓旣成公自作水調歌頭云萬里籌邊處形勝壓坤維恍然

舊觀重見鴛瓦拂參旗夜夜東山銜月日日西山橫雪白羽弄空暉人語半霄碧驚倒路傍兒分弓了看劍罷倚欄時蒼茫平楚無際千古鎖煙霏野曠岷嶓江動天闊峭函雲擁太白暝中低老矣漢都護卻望玉關歸按今籌邊樓在都院之東掖隨使節而遷者李燾云華陽縣主簿廳有會昌中壁記乾符中柱刻會昌迄今三百年成都千門萬戶時遭焚裂求往日之破甃斷檻殆尺寸莫獲而此廳事獨存巧塤朱墨不改其舊是豈偶然耶爲之記而刻諸梁上



蜀中名勝記卷之四

Blank page with vertical lines for text.



蜀中名勝記卷之五

閩中曹學佺能始著

成都府五

新都縣

華陽國志蜀以成都廣都新都為三都號名城古語云廣漢有二雒新都為上雒建寧中江為下雒也寰宇記云新都縣本漢舊縣屬廣漢郡後置新都郡故城在今縣東太康中又為縣隋移置於此按晉史武帝咸寧二年封子該為新都王以新都郡為新都國唐張說新都南亭送郭元振盧崇道詩竹徑



女蘿蹊蓮洲文石隄靜深人俗斷尋玩往還迷碧潭  
秀初月素林驚夕棲寒幌納蟾影理琴聽猿啼佳辰  
改宿昔勝寄坐睽攜長懷賞心愛如玉復如珪歐陽  
詹新都行云縹緲空中絲蒙籠道傍樹翻茲葉間吹  
惹彼花上露悠揚絲意去苒弱花枝住何計脫纏綿  
天長春日暮宋陸游早發新都驛詩喔喔江村雞迢  
迢縣門漏河漢縱復橫繁星明如晝愛涼趣上馬未  
曉閱兩堠高林起宿鳥絕間落驚獸寺樓插蒼煙沙  
泉瀉齒竇我行忽萬里坐歎關河富官如廣文冷面  
作拾遺瘦今年盍歸哉勿落春歸後新都驛有遠平

軒劉望之題云霜晴木落送歸鞍袖手微吟此慰顏  
賸欲憑欄招白鳥更煩剪樹出青山晚悲薄祿非三  
釜賴許清時見一斑看到遠平纔得恨我盍歸卧尺  
椽間自注云軒有外氏周次元帥蜀詩  本志云  
治北半里寶光寺後有柱礎圍丈二尺圓徑二尺高  
尺八寸唐僖宗避黃巢至蜀遣御史賫璽書召知玄  
國師憇息其處掘地得石函中有如來舍利尋建浮  
圖以瘞之仍敕精藍曰寶光  寰宇記云麗元山在  
縣北八里平地特起四絕高三丈有雙石鏡廣五尺  
嘗掘其下至水而未臻其極  本志云縣北十五里



二石關各高丈三尺一題云漢故兗州刺史雒陽令王君稚子之闕一云漢故先靈侍御史河內縣令王君稚子之闕闕兩角有斗又作重屋四壁刻神像人物牛馬之類今已漫滅詳畫苑中 寰宇記云八陣圖在縣北十九里彌牟鎮蜀志亮推演兵法作八陣圖咸得其要李膺益州記云稚子闕北五里有武侯八陣圖土城四門中起六十四魁八八爲行魁方一丈高三尺緯略曰八陣圖在新都者峙土爲魁植以江石四門二首六十四魁八八成行兩陣並峙周凡四百七十二步魁百有三十也 陸游九月十日如

漢州小獵於新都彌牟之間投宿民家詩云適從邛州歸又作漢州去天低慘欲雪遊子悲歲暮十年辭京國疋馬厭道路野火炎高岡江雲暗空戍角弓寒始勁霜鶻飢更怒邂逅成小獵尺箠聊指呼北連武侯祠南並稚子墓合圍蹙窮鹿設伏截狡兔壯哉帶箭雉耿介死不顧吾益暴天物戰法因得寓黃昏過民家休馬燎裘袴割鮮盛燔炙毛血灑庭戶老姥亦復奇汎婦邀我駐丈夫倘未死千金酬此遇 古今集記云新都南十七里有宋興成山高百四十丈週三十餘里山色赤岸邊若有火光又名赤岸益州記



云赤岸山頂有湧泉週迴數丈深八九尺澄澈不竭  
龍門山在縣南二十里趙抃次孫直言九日登龍  
門山詩皇祐二年秋九月九日龍門遇佳節新都大  
夫孫隱之報政優游共民悅升山高會賓主俱滿頭  
黃菊泛茱萸遙開醉眼極千里身高氣爽胸懷舒遲  
時感物以次發詩成落落傾璣珠初言府政好太守  
化行歲稔民力蘇喜聲協氣遨以狂稚子負老老者  
扶又言登臨風景異澄川秀野如披圖殊方眞賞到  
奇處未來空只誇江湖得之獨善不在已遠遣遺我  
口煩紆嗟我江原亦民長周遭百里平如掌簿書役

役甚囚拘聞有岷峨無計上及聞沼邑茲山奇脚力  
不到神魂馳誰知我亦好山者篋中時復觀君詩  
西南十五里有繁陽山與新繁接錄異記云繁陽山  
麻姑洞卽二十四化之第一陽平之別名也在繁水  
之陽因以爲名本際經云天師張道陵所遊太上說  
經之處在成都府新都縣南渡江十五里眾山連接  
孤峰特起是也神武皇帝潛龍之時光化二年己未  
五月四日丙申山土摧落洞門自開縣吏時康道士  
張守眞等以事申府云自洞門開後每日有百姓往  
來者府差縣典陽澤畫工任從與守眞同往檢覆畫



圖申上稱把燈燭入洞看檢其第一門對北高二尺濶三尺五寸入至第二門約五尺已來第二洞門方一尺六寸入內並是黑處長一丈二尺濶六尺有石窟兩處在東畔并西南有洞門兩路南畔一路圓濶一尺六寸入內長一丈二尺濶一丈高四尺南畔有石窟三處西畔兩路入內通遶門圓濶一丈七尺內各濶五尺高六尺已來門相去一丈門屋一所高五尺濶四尺從內往來有刻料拱甌瓦約山作石日月兼作日字月字隔子房一所濶二尺五寸高一尺五寸刻料拱甌瓦石窟一所高一尺濶一尺五寸門濶

五寸石窟三處各濶七尺又西入洞門圓濶一尺七寸灣曲入向南門屋一所高六尺濶四尺從內來往有石料拱甌瓦又有竈模兩所共一牀高一尺濶二尺三寸門濶八寸有石料拱西北角又有一門方一尺六寸內方二丈已來南畔西畔北畔各窟一所南角又有一洞圓濶一尺六寸已來將燈燭近前有黑氣出燈火卽滅更入不得其洞連接繁陽本山相去三里已來據諸生張贊等狀稱繁陽是古迹山每准勅祭祀其洞亦是元有往往閉塞元和中南康王章皋蒞蜀洞忽開時人咸云洞開卽年豐物賤尋又閉



塞至是復開其後果遠近豐稔洞本名麻姑山側有麻姑宅墓蓋修道之所也

雙流縣

華陽國志云廣都縣在蜀郡西三十里漢元朔二年置有魚田鹽井之饒江有魯漕梁山有鐵鑛江西有安稻田穿山崖過水二十里唐司空曙送柳震還蜀詩白日雙流靜西看蜀國春桐花能乳烏竹節競祠神蹇步徒相望先鞭不可親知從江僕射登榻更何人宋李新廣都道中詩萬花織籬凡幾曲繡屏處處圍茆屋家貧張日無羅幕東風吹開莫吹落居人

應笑行客癡春去春歸殊不知予以庚戌暮冬過此作詩云萬里橋方度雙流徑即存薄寒成翠色疎雨點黃昏竹柏密他樹水雲平過村林鳥棲欲盡纔到縣西門古跡有盤古祠徐整三五歷記云天地渾沌如雞子盤古生其中八萬四千歲天地開闢清陽爲天濁陰爲地盤古在其中一日九變神於天聖於地天日高一丈地日厚一丈盤古日長一丈如此滿八萬四千歲天極高地極深盤古極長後乃有三皇數起於一立於三成於五盛於七處於九故天去地九萬里也此寰宇記所引羅泌路史亦云于廣都得



盤古之祀 有大塔山陰宏道益州山川圖云阿育王使鬼兵造八萬四千塔廣都有其一 有商瞿里本志云治東十里瞿上鄉有孔子弟子商瞿上墓時有錦雞白鷓見焉文明之德未艾也 有宜城山寰宇記云宜城山在縣東南十里李膺益州記云宜城在牛飲水南今按紫草山岡阜相屬高百餘步連入陵州貴平縣界是 周地圖云清水在縣北十里改名牛飲水李膺記云水名客舍昔程鄭家於此每羣牛飲江爲之竭故名按蜀漢尙書蔣琬宋布衣李甲宅俱在宜城山下茂林清泉致可喜也 有公孫

述墓寰宇記云在西四十里高三丈墓內銅作網結雖遭亂世莫能侵毀有葛陂本志云治北十里龍池舊名葛陂道漢費長房至此以杖擲陂中化龍去 有天師觀紀勝云在廣都縣北張道陵祠旁壇下有井名伏鬼井趙閱道記華陽縣衡山有井妖怪藏其中道陵運石以鎮之鬼妖乃絕邑人爲立祠植杖井旁今爲喬木曰戒鬼木 有朱辰墓華陽國志云漢時縣民朱辰字元燕爲巴郡太守甚著德惠辰卒官郡獲民北送及墓獲蠶鼓刀擗踊感動路人於是葬所草木墳許皆倣其曲折迄今蜀人莫不歎辰之



德靈爲之感應今朱氏爲首族也 有牧馬川寰宇  
記云在陵州北一百二十五里蜀先主于此置籍田  
牧馬在江中俗因名牧馬川今割屬廣都縣本志云  
在縣東南八里 有龍華山唐詩紀事段文昌字墨  
卿別業在廣都縣之南龍華山嘗杜門力學于此俗  
謂之段公讀書堂長慶初朝議文昌少在西蜀諳詳  
利病詔授劍南節度使有邑人贈詩曰昔日騎驢學  
忍饑今朝忽着錦衣歸等閒畫虎驅紅旆可畏登龍  
入紫微富貴不由翁祖致文章生得羽毛飛廣都再  
去應惆悵猶有江邊舊釣磯 文昌還別業有尋龍

華山寺廣宜上人詩云十里惟聞松桂風江山忽轉  
見龍宮正與休師方話舊風煙幾度入樓中郭震題  
龍華山詩云昔年曾到此山回百鳥聲中酒一杯最  
好寺邊開眼處段文昌有讀書臺何耕題文昌讀書  
臺詩云段公會此讀羣書讀破應須萬卷餘家禮一  
傳爲雜俎稗官收採附虞初按方輿勝覽文昌讀書  
堂在廣都縣順聖寺南碑目云龍華院山門路記後  
唐天復七年立今爲觀音院矣 何耕題龍華佛閣  
詩云西川鑿山三大像突兀皆在江之湄修覺九頂  
見略盡獨此恨未瞻容儀竭來勝地了疇昔輕軒瘦



馬相追隨百尺金軀信雄傑三乘寶閣何瑰奇然犀不用照幽鬼擊鼓自合趨馮夷前人開創願力廣下與舟楫扶傾危六月灘濤劇奔吼一分性命爭毫釐篙工落膽行者泣彈指乞活天人師人心狎水水多禍佛力在人人不知年來蜀產坐腹削夜半有力真能移峩舸大扁去不絕綵鷁破浪風揚旗佛慈只作布施想江神雖怒將何爲又題龍華山寺云傑閣山爲佛精廬地布金水涵空濶淨路繞翠微深鳥下窺齋鉢龍歸識梵音城中塵眯目那得此幽尋又龍華大像慧冀國夫人所作因成絕句云慧性元從戒定

薰百花潭水浣僧裙箇中力量真超絕故老尙傳娘子軍 有郭信可隱居卽郭印也何耕題其雲溪詩云幽居定何如頗恨未見之主人向我言喜色融雙眉修篁流翠陰寒溪漾清漪領略非一狀幽妍發餘姿主人信妙士得此固所宜又題浮翠橋詩云隔溪蒼翠各西東架竹爲梁路始通缺月罅林凝淨綠斷霞明水抹殘紅芒鞋步步幽深處藜杖聲聲屈曲中回首忽驚橋已遠冷然身御圃田風寒碧亭詩云憑欄日日俯清湍洗竹年年斬惡竿十頃琉璃秋色淨一林竽籟曉聲寒涼風有意生天末明月無邊照水



端誰謂過清難久處愚溪元自不相安遠色閣詩云  
小小樓居著散仙淵明真趣本悠然招呼雲月闌干  
曲顧揖江山拄杖前獨鳥倦歸翻落日誰家晨爨起  
疎烟根塵應接無留礙笑殺胡僧面壁禪假山詩云  
空庭幻出小嶙峋假外應須別有真只恐話頭成兩  
橛若爲融攝主和賓蓮塘詩云色香無比出西方何  
物妖狐號六郎手折一枝聊供佛前身定是老柴桑  
蘭坡詩云蘭與高人臭味同含薰聊復待清風紛紛  
蕭艾毋相笑爾輩敷榮轉眼空龍淵詩云門前大江  
何渺漫昔人飲牛水爲乾水乾龍逝亦其理近在咫

尺聊泥蟠魚蝦玩侮獷獪笑縱有靈怪誰當看德人  
問舍厭吾境便爾築室相遮欄坐令異類皆屏伏恃  
有此耳差少安却紆朱紱去監郡遣我守舍良獨難  
昨來過門恍如夢龍致此語催歸鞍先生不信反大  
笑謂我饒舌狂豐干虛舟詩云君不見江皋車馬紛  
相送巨扁峩峩船載重西南使者解官歸水淺着沙  
牽不動如君材具豈多得合侍明光參法從胡爲淺  
瀨著虛舟頗肖胸中大虛洞問君此意竟安在欲說  
向人誰與共山林鐘鼎本同轍繫岸截江隨所用入  
窗窅窅淨無塵一水泠泠清可弄何當抱被過君眠



分破江天幽夜夢忘機臺詩云太虛生微雲機事日夕繁兼忘豈不佳尙有忘者存稽首老龐翁妙處希一言請觀堂上月萬古無朝昏和光亭詩云枯木倚寒巖三冬無暖氣達人定汝笑胸中太涇渭不妨聲色海徑造佛祖地所以亦樂翁花前時一醉

郫縣

華陽國志張儀城郫周回七里高六丈上置觀樓射圃與成都同制晉元康三年民謠曰郫城堅盜底穿郫中細子李特細蓋李特自稱益州牧治此城也寰宇記云犀浦縣周垂拱二年割成都之西鄙置蓋

因李冰所造石犀以名杜甫詩南京犀浦道指此在縣東二十里本志云縣治儀門下穿洞直通犀浦極深厥高可十尺許每夜月中天洞中曙光如晝古謂之明月洞又云治內東土臺墳起下有池其底有井謂之郫筒井井畔產巨竹剝爲筒汲水而釀包以蕉葉纏以藕絲信宿香達于外或云山濤治郫以筠釀醪糜酒旬日香聞百步今池井俱存竹則不產一云池中土臺突起列方圓二井名鴛鴦井也 成都文類諫議司馬池尉郫之明年生子光於官廨字之曰岷以山稱也於是諫議公手植栴樹一本于庭及温



公歿後若干年郫邑李丞作堂祀公且以護樹張行  
成記之 揚雄蜀紀云杜宇一名杜主代魚鳧王蜀  
徙都于郫卽杜鵑城也後傳其位於鼈靈宋陳皋記  
云杜宇鼈靈墓在郫縣南一里二塚對峙若邱山俱  
隸淨林寺二里 勝覽云郫縣有子雲讀書堂本志  
云縣南二十里外子雲亭卽葬所也亭北半里有拜  
臺相傳爲拜子雲墓而築 寰宇記云郫縣有漢司  
空何武宅武之弟攀從刺史王濬伐吳有功歸國闔  
門治疾不預世事武之後隨有養竹園人盜其筍隨  
遇見之恐盜者怖走或傷其手足因挈履徐步而歸

東坡紀勝云郫縣有張白雲先生故居范鎮留題張  
少愚屋壁詩云高隱郫城下平時仍往還門開值冠  
蓋簾卷爲江山沛雨人間待片雲天外閒泥封詔不  
起朝夕奉慈顏文同題張少愚書院詩云澗水浸斷  
橋車馬不得通飛嵐積庭礎秋蘇垂紫茸窗紙爛溪  
雨簾衣折林風主人殊未歸使我烟景空 水經註  
云江水又東北逕郫縣下縣民有姚精者爲叛夷所  
殺掠其二女二女見夢於兄曰當以明日自沈江中  
喪後日當至可伺候之果如所夢得二屍於水郡縣  
表異焉 古語云郫縣七十寺分布四郊內其最著



者法定寺高僧傳云法定寺是漢永平年佛法初入中國時建後晉惠遠寓居著神異至隋始改爲法定焉寺有彌勒聖像乃江流枯查所製唐貞觀長史高士廉蓋殿以安之有僧汎愛者樹其浮圖獲巨蟹身長二尺餘此塔嘗被霆擊而復合爲釋惟忠所禱云

新繁縣

水經註云成都江北則左對繁田文翁又穿湔泐以溉灌之凡一千七百頃蜀漢延熙十年涼州胡率眾降增戶于此俗間謂之新繁也禹貢曰岷山導江東別爲沱孔安國註云江東南流沱東行鄭註云此

沱尾入江不於江出晉太康地記云江沱在繁縣蕭廣濟註江賦云觸玉壘山東迴爲沱據漢書溝洫志此江卽秦守李冰所鑿非禹貢之江沱明矣本志云李冰導水見水勢橫突乃鑿九井象九宮以厭之元末井堙塞新建石橋存志云衛湖蜀漢縣令衛常所開在學宮後又有東湖李德裕爲宰日將開此湖夜夢一老父曰某潛形其下幸庇之明府富貴今鼎來七九之年當相見於萬里外也明日於土中得一墓徑尺餘乃投之水後德裕果至宰相六十有三卒於朱崖應其夢焉按宋侂衛公堂記略繁江令舍之



西有文饒堂者舊矣前植巨楠枝幹奇怪父老言唐李衛公爲令時鑿湖于東植楠于西堂之所爲得名也志又曰宋蘇實治平間爲繁令有異政嘗厭衛湖蛙鳴令人取一大者以硃點之戒曰毋再喧囂已果不鳴及湖中涸羣蛙結聚成團啟視之則硃點者居中羣蛙若擁翼焉蘇令悉放于江終其任湖蛙無一鳴者唐初隱士朱桃椎茅茨賦云若夫虛寂之士不以世務爲榮隱遁之流乃以閒居爲樂故孔子達士仍遭桀溺之譏叔夜高人尙被孫登之笑况復尋山玩水散志娛神隱卧茅茨之間志相青雲之外

逸世上之無爲亦處物之高致若乃覩余庵室終諸陋質野外孤標山旁迥出壁則崩剝而通風簷則摧頽而瀉日是時翫居晚思景媚青春逃斯澗谷委此心神削野藜而作杖卷竹葉而爲巾不以聲名爲貴不以珠玉爲珍風前引嘯月下高眠庭惟二逕琴置一絃散誕池臺之上逍遙巖谷之間逍遙兮無所託志意兮還自樂枕明月而彈琴對清風而緩酌望嶺上之青松聽雲間之白鶴用山水而爲心翫琴書而取樂谷幽偏覺鳥聲嬌聲高韻細盡相調見許毛衣真亂錦聽渠聲韻宛如歌調絃乍緩急向我茅茨集



時逢雙燕來屢值遊蜂入水開綠水更應流草長階  
前還復涇吾意不欲世人交我意不欲功名立功名  
立也不須高總知世事盡徒勞未會昔日三箇士無  
故將身殞二桃贊曰先生知足離居盤桓口無二價  
日惟一餐築土爲室卷葉爲冠斲輪之妙齊扁同觀  
文苑云新繁朱桃椎茅茨賦薛稷爲之序略云穩卧  
茅茨之間屬想青雲之外逸世上之煩襟遂明時之  
高志而已矣宋楊甲謁朱真人祠詩云一濯巖下溪  
再拜巖中庭清風蕭然來吹我衣上腥仙人芙蓉冠  
乘月下雲軒山空雜佩響靜夜朝百靈似聞客欲去

小語猶丁寔肅肅上松柏急以兩耳聽寂寥古壇外  
但見斗與星天明恐是夢恍惚遺心形去飲石上水  
再讀幽人銘青山無行迹霧雨空冥冥 又有勾氏  
者隱于盤溪成都文類勾昌泰詩云黃塵沒車轂平  
地得林邱花木風光早陂池煙雨秋不彈長劍鋏甘  
賦大刀頭九軌利名痼逢君慰少瘳又從俗解所得  
九牛中一毛強牽麋鹿性要學豹龍韜野服顏常好  
晴窗首自搔向來誤應聘塵土汗吾袍又客至輒命  
酌爲言花已開青山長委髻白骨舊生苔不飲固癡  
絕能詩宜數來頗憂明日雨紅紫落成堆又勝簪不



肯黑浮白故能紅心寄塵埃外春歸杖履中徑松青  
謾謾庭草碧茸茸無術繫白日光如轉蓬按盤溪  
主人勾友于字信卿李石記云有樓以藏書堂以教  
子臺以賦詩榭以置酒自誓曰俗子污我不污門凡  
士浼我不浼室清風肅戶明月贊席抱琴之童挾卷  
之士照映几杖之側徜徉筆硯之間

温江縣

華陽國志魚鳧王田于湔山忽得仙道蜀人思之爲  
立祠成都文類孫松壽觀古魚鳧城詩野寺依修竹  
魚鳧迹半存高城歸野壠故國藹荒村古意憑誰問

行人漫苦論眼前興廢事煙水又黃昏註云在温江  
縣北十里有小院存按漢文苑資中王子淵以宣帝  
神爵三年有事湔上作僮約文卽此縣也 寰宇記  
云皂水在温江縣李膺記相林寺前清皂二水是矣  
任慥渠堰志云九昇口堰其源出於皂江至郫之柵  
頭別流爲湓江口而九昇口者實兩江之滙也杜甫  
陪李七司馬皂江上觀造竹橋詩伐竹爲橋結構同  
褰裳不涉往來通天寒白鶴歸華表日落蒼龍見水  
中顧我老非題柱客知君才是濟川功合觀却笑千  
年事驅石何時到海東趙抃早離温江夜泊白沙步



詩曉與諸孫別依然頗動懷去乘蘭棹穩行得綵衣  
偕漁父遙連市村扉半掩柴夜來溪上宿夢已在高  
齋 宋史哲宗紹聖四年夏四月八日有芝生于温  
江縣觀音院齋廳之楹一本而數結煙縷氤氳閱月  
不散邑令孫漸扁其處曰芝堂而爲之頌云西母薦  
祉金精効奇是生神草雲英瓊蕤給園之中湔水之  
湄地其齒矣芳而孰知陟彼岷宮真人願願夜授秘  
訣謂余攀之沃之醴泉濯之天池羞以石髓茹而忘  
飢黃綺爲侶喬松可期盍獻天子以薦神祇 古今  
集記治西三里之金烏池唐高宗曾夢金烏集于益

州巨木上遣使訪至此見烏三足而金色浴于此池  
志云今有金烏觀存 集記温江治西三十五步有  
女郎祠張天師孫靈真之女名玉蘭者幼不茹葷十  
七夢吞赤光感孕爲母所責一夕無疾而卒有一物  
如蓮花自腹中出開視之乃本際經十卷葬百餘日  
雷雨晦冥失經所在墳壙自開而飛昇棺蓋掛于巨  
木之上此三月九日事鄉人至今如期齋祭之按郡  
國志梁州女郎山張魯女浣衣石上感赤光之祥而  
懷孕生二龍及女死將殯柩車忽騰躍升此山遂葬  
焉其浣衣石猶在因謂之女郎山其說略同



彭縣

志云縣西北三里有劉宋時晉壽郡城梁東益州西魏天水郡後周九隴郡唐武德之濛州垂拱之彭州皆理此 寰宇記云濛陽縣唐儀鳳年于濛江之北置故曰濛陽蓋彌濛水源出九隴縣來經當縣南二百五十步本志云東二十里之濛陽鎮有故縣址志又云北三十里之二郎鎮乃九隴縣址以九隴山爲名寰宇記云九隴山自永昌縣連亘至縣界屈曲而九折也方輿云九隴者古彭州之西山一伏隴二豆隴三秋隴四龍奔隴五走馬隴六駱駝隴七千秋

隴八較車隴九橫擔隴故有九隴之名 陸放翁云天彭號小西京以其俗好植牡丹有京洛之遺風古今雜記孟氏以牡丹名苑于時彭門爲輔郡興州者多其戚里得之上苑此彭門花之始也天彭亦謂之花州而牛心山下謂之花村云 治內有東湖元符中袁騰記云九峰高峙濛水濬發樓閣亭軒隱見于茂林修竹間又有西湖元和中守王潛蕭祐創造上鄧袞記云二公陶奇撰幽不乏心匠于西湖臺島花竹布置罔不宛妙也 勝覽云南樓在郡圍中范百祿有記文同彭州南樓詩云百尺壓城端飛簷欲上



博湖光搖埤坵山影轉欄干秀野含春煦喬林擁暮  
寒回頭大岷雪千仞正噴岷 勝覽又云望雪樓在  
子城上唐彭州守建以望雪山太和進士鄧袞銘曰  
維蜀之鄙截如巨砥厥郡維彭西北天屏危碧峭青  
憂霄摩冥鯨跳虬奔限蠻隔番上排雪峰延疊萬重  
鶴螯瑤軒月積綃鮮振古不泐四節一色皎皎披飄  
寒涸陰膠光涵二水冷射千里往哲所嘉名之玉壘  
高適爲州刺史彭州山行詩云峭壁連崆峒攢  
峰疊翠微鳥聲堪駐馬林色可忘饑怪石時侵徑輕  
蘿乍拂衣路長愁作客年老更思歸且悅巖巒勝宜

嗟意緒遑山行應未盡誰與玩芳菲蘇頲贈彭州權  
別駕詩雙流脈脈錦城開追餞年年往復迴祗道歌  
謠迎半刺徒聞禮數揖中台黃鶯急囀春風盡斑馬  
長嘶落景催莫愴分飛歧路別還當奏最掖垣來  
集古錄載秦李冰爲蜀守鑿山導江以去水患其神  
怒化爲牛出沒波上君操刀入水殺之因刻石以爲  
五犀立之水旁與江誓曰後世淺無至足深無至肩  
謂之誓水碑立在彭州馬端臨云彭州掘地得絳帖  
舊本字畫清勁頗類舊武岡而差優也 寰宇記云  
九隴縣灌口鎮之城西有玉女祠祠西有蜀守李冰



祠 五代史補蜀王衍與其太妃遊青城山遂至彭州陽平化志云今金城山之仙居觀是其駐蹕所也金城山形如城上應角宿卽二十四化之陽平治志又云治北五十里白石溝卽瀆沅山也上應房宿山有鴻都觀下觀名曰響石寰宇記以瀆沅作麗元云范蠡學道於此又云五龍山有神溪水仙人李伯陽登山嗽之今爲溪源山高數百丈延袤二十餘里山麓有洞旱時祈雨巫者初入握火燭之行少頃跂足而望懸崖中有斧鑿痕如井深數十百丈牖一線之明而烟焰裊然上衝謂之天生眼至此少偃

息復入第三四五六洞洞下重淵深不可測盛夏水冷如冰以編竹筏寢其上逡巡蟻附而入抵第七洞龍所穴也始用符咒取水盛竹筒而出離洞口卽有風雷隨之而雨作焉間值洞中水壅巫者多不得出勝覽云葛仙山有崇真觀在濛陽北四十里二十四化之第五化也葛仙翁瓚楊仙翁昇賢於此得道大同中蒲仙翁高遠復於此白日上昇梁武錫名上清觀劉孝先作碑以紀其事按成都記韋皋夢神人謂曰異日富貴無忘葛瓚也後尹成都再夢乃復新觀宇皋自爲記雲笈七籤云葛瓚化迴迴巖巒左右



蜀中雜記 卷五 五  
嵌穴地靈境秀迥絕諸山故有二十四峰八十一洞  
觀下有礮泉深在谷底汲之非便此宮之西過崖磴  
十五步巨石下有丁東水出於崖腹滴入窪石竅中  
中和年刺史安金山准詔投龍郡縣參從者三百餘  
人忽有污觸其水者頃刻乃竭安公與道流頗懷憂  
懼夜至泉所拜手焚香叩祈良久涓涓而滴雖從騎  
之眾食之充足每年三月三日蠶市之辰眾逾萬人  
宿止山內飲食之外水常有餘矣 勝覽云至德山  
在郡西三十里上有廣明院蜀王衍專事遊幸嘗登  
是山患其高險令於福唐寺東別開一徑凡數里廣

可二丈栽松砌石以達於市從官悉騎以從松枯石  
怪尙有存者本志云至德山有三昧泉白石竇噴冽  
方大如斗不竭不溢俗傳卽知玄國師洗人面瘡之  
處至今疾者洗之多効按高僧傳釋羅僧者蜀聖寺  
中得果位人也嘗寢疾於五臺山同會僧眾俱不之  
測悟達國師獨善視之將及九旬病愈別去云所苦  
今遂平復由師之力我住在劍外九隴郡之茶籠山  
爾異日遊方無忘相訪也悟達暮歲至蜀歷訪羣峰  
訊老樵輩皆以未嘗聞茲山名乃嘆曰噫病禪之妄  
也將迴遇一山童曰某是彼巖之聚沙者前導而去



羅中野解讀 卷之五  
俄觀殿塔儼空房廊環肅果值昔之病僧迎門敘故  
日將暮矣而謂之曰茲寺非得漏盡通不能至爾以  
宿緣一諧邁止言奇遇乎斯爲未可爾其克勤修證  
詣果胡難乃命舊童送師歸去迴望之頃但見巖壁  
峭峻杉檜莽蒼而已則開成中事也時知玄著傳之  
次得僧可思尤閑地理爲玄作瑩兆于丹景前峰其  
山若雉堞狀雖高低起伏而中砥平俄有里人耆老  
曰古相傳云茶籠山是 志云縣北三十里丹景山  
舊志以爲山蒔牡丹春時紅艷照人故名其前爲彭  
門山兩山對峙懸崖絕壁相去數百步如門卽天彭

門也或曰彭祖徧游洞府以窺聖迹嘗往來于其中  
五代史補僞蜀太后徐氏題丹景山金華宮詩云碧  
煙紅霧漾人衣宿露蒼苔石徑危風巧解吹松上曲  
蝶嬌頻採臉邊脂同尋僻境思攜手暗指遙山學畫  
眉好把身心清淨處角冠霞帔事希夷太妃徐氏和  
云丹景山頭宿梵宮玉輪金輅駐遙空軍持無水注  
寒碧蘭若有花開晚紅武士盡排青幃下內人皆在  
講筵中我家帝子傳王業積善終期四海同 寰宇  
記云白鹿山在九隴縣北五十里周地圖記云宋元  
嘉九年有樵人於山左見羣鹿引弓將射之有一麋



所趣險絕進入石穴行數十步則豁然平博邑屋連  
接阡陌周通問是何所有人答曰小成都後更往尋  
之不知所在 勝覽云白鹿山有大乘金覺禪寺本  
晉佛圖澄所建上有洗腸池按大同志晉永寧二年  
羅尙殺隱士劉做做故州牧劉璋曾孫也隱居白鹿  
山高尙皓首未嘗屈志尙信妖言而殺之矣 輿地  
紀勝云彭縣大隋山之景德寺大業中神照禪師投  
錫之所有木禪庵白龍井山生竹若龍頭俗呼龍頭  
竹勝覽云大隋去壩口鎮三十五里神照所居有瀑  
布張天覺記云西山之勝在彭門者大隋爲甲郭印

詩云我聞大隋名夢寐猶記錄得檄天彭道喜氣知  
可掬出城六十里崎嶇轉江曲山門忽斗上危步依  
筇竹崩石帶煙雲異草羅澗谷寂鳥下窺人纍猿時  
掛木路窮纔見寺金碧煥雙目祖師古定光燈冷無  
人續開公生異世大事如付囑僧言山長陰朝暮雲  
容蹙茲辰爲我晴疊岫堆濃綠虛閣倚秋風一洗塵  
土俗舉手揖丹景橫身跨白鹿十年勞問訊親到心  
始足坐久燭漸微借榻雲間宿山寒寐不成窗外泉  
鳴玉 高僧傳彭州土溪智陀子言庵主綿州人也  
初至大隋聞舉石頭和尚示眾偈倏然領旨歸隱土



溪懸崖絕壑間有石若蹲異獸師鑿以爲室中發異  
泉了無涸溢四眾訝之居三十年化風盛播初室成  
日作偈曰一擊石庵全縱橫得自然清涼無暑氣涓  
潔有甘泉寬廓含沙界寂寥絕眾緣箇中無限意風  
月一床眠 勝覽云中隋山在大隋之後上山三十  
里至光相閣三月半間掃去積雪下視葛仙白鹿大  
隋眞培塿也 碑目云九隴縣龍懷寺碑唐王勃撰  
略云龍懷山者井絡之所交會岷隅之所控帶攢峰  
北走吐香嶂於元霄巨壑南馳歎洪濤於赤岸香城  
寶地左右林泉碧岫丹岑往來煙樹隋開皇五年始

賜額爲龍懷寺因嶂爲壁憑崖列戶地鄰縣左遂均  
縣上之恩山似龍盤卽建龍懷之刹 按彭州寺  
觀特盛故予隨類而詮次之則山川亦可見焉

### 崇寧縣

唐之唐昌縣宋初之永昌縣也熙寧間狄道李子忠  
來牧是邑構堂于其所居之西北隅而命之曰治已  
修筠珍榦羅立環擁寒溜滾滾渠行沼畜公事旣休  
卽來其間此文與可記之云 唐咸通中御史中丞  
吳行魯出知彭州於州之唐昌縣心置草市歇馬亭  
及靈岩報恩院陳谿爲之作記立碑建德鄉其詞曰



聖上以南夷不虔邊塵坌起候旦授執政意俾擇要  
郡以良能而牧之遂命御史中丞渤海吳公行魯持  
節出刺雅安公松筠植心金石勵志雅安實邊之衝  
東入嶮隘應援由此公至止一顧屹如巨防當危疑  
之秋瞬息無事郡人以考秩將滿預懷去思接武陳  
誠願借綏撫丞相隴西公以公功業昭著飛章上聞  
請充節度叅謀兼諸軍行營副都知兵馬使東路行  
營都知兵馬使仍兼知黎州巡邊制置公遂於大渡  
河弔置一橋亘五百尺自干戈未盍士馬旁午饋運  
往復商旅經過曾無覆溺之憂永絕滯留之患至今

行者見必歸恩異跡奇謀繁難具紀由是復升于犍  
爲雅之南千里縣道烽堡相躡早夕軍食跂俟於犍  
爲公智出事先機生料外風波助意舟楫如飛是得  
闔境無虞諸軍飫飽實公之功也由是天子以彭門  
名郡而償其重勳公輒車之日卽究風俗民之憂苦  
已明其重輕事之興廢已熟其利病從便革弊幽顯  
愜心郡內旣肅施及支邑以唐昌縣中界接導江郛  
城東西綿遠不啻兩舍雖有村落僻在荒塘昔置郵  
亭廢毀將久行役者野食而泉飲貿易者星往而燭  
歸鼓鼗公行投告無所深溝雨漲古陌橋摧跬步難



踰艱苦寔述况輸役責限徵斂有程而欲罪其稽逋者乎公惻然凝想卽日計成遂陳於連帥於縣心置草市因其鄉名便以建德爲號自此四來者旋踵而迓迎中望者舉目而知歸老幼攜挈倏然而至萬家歡笑共事修營不旬日而告就今則百貨咸集蠢類莫遺旗亭旅舍翼張鱗次榆楊相接桑麻漸繁如此牧人可謂移風易俗矣昔武侯以蜀腴脆故令隣邑翊日而市意在習其筋力而俟之征徭又每及上春以蠶爲名因定日而有知所往公亦約之以期而候之其日商旅輩貨至者數萬珍織之玩悉有受用之

具畢陳想人之心豈待詢問而知其歡悅也復以路由諸部疊跡輸蹄徘徊一息無稅駕之所遂出俸錢建長亭崇軒邃室外廡內廚帷薄精新器物充足則往來者非止晝食而卜夜可矣人旣繁會俗已豐饒又置一鎮抽武士三十人而禦之創立解署早暮巡警盜將竄跡人遂高眠不感晨雞無聞夜犬皆云康泰不可比儔又茲地會昌之前有佛寺數所因廢而未興鄉閭求福無處禮敬像設之儀莫識鐘磬之聲不聞僻野深郊轉爲龔俗復置靈巖報恩院修北方天王及侍從奇工妙飾相好無雙高墉環合門廡揭



立又度僧住持行道無有虛日斯人也非只豐足而  
永逃天札之患得不紀其盛跡而垂於無窮哉

*[Faint bleed-through text from the reverse side of the page, mostly illegible due to fading and bleed-through.]*



